

Jovennan curpa grandi tur caminda danki na e maldito pildoranan

Tirando un bista rond di nos isla ultimo tempo ta ripara e jovennan cu ta cana cu curpa di "Arnold Schwarzenegger" y ora puntra ta cuanto año nan tin, ta resulta cu tur ta entre 15 y 20 año di edad.

Bo lo pensa cu nos ta den generacion di "curpa bunita" pero ora haci pregunta ta bin resulta cu e jovennan aki ta hisa peso, y ademas di hisa peso, ta usa pildoranan y hasta injeccionnan cu ta cay bao di droga of narcotrafico.

Tur esaki pa aumenta nan musculonan mas lihe posible sin tene cuenta ki peliger nan ta causa pa nan mes y pa comunidad.

E productonan aki ta drenta Aruba na forma ilegal y ta causa daño grandi cerca e muchanan, pone nan bira agresivo despues y riba esey ta bay comete tambe actonan delictivo.

E peliger ta cumenza cerca nan cu hasta posibilidad grandi di bira impotente y culmina den problema social pa nos isla.

Con nan ta comunica cu otro ?

"Hey mano, bo tin bunita curpa, bo ta train hopi?"

"No, mi ta hisa peso".

"Pero bo ta tuma pildora tambe".

"si, pero, ehmm.....".

Man ta bay saco y fulano ta saca un paki: "Mira, esaki ta locual bo mester, esaki den corto tempo ta dunabo e curpa di un bodybuilder famoso".

Joncuman ta tume, cumpre despues y ta keda bao di gara di fulano cu ta keda chica placa di dje, sin importa den ki direccion el a conduci e joven.

Pero tirando un bista den comunidad, mi ta puntra mi mes si den nos gruponan di vigilantenan di orden, prevencion y seguridad, e cos aki no ta tuma lugar, mirando e jovennan cu ayera tabata "toothpick" y cu awe ta un "Schwarzenegger", "Mr. Olimpia" of un "Charles Atlas".

NOS IMAGEN TURISTICO DAÑA AYA FO

Hopi hende lo no a keda contento di a lesa e publicacion di ayera encuan to Time Share na Aruba, cual a sali den CNN diaranzon mainta y cu a duna imagen mahos di Aruba.

Nos mester acepta cu hopi di e cosnan aki ta verdad.

E hendenan ta inverti 7 te 20 mil dollar den un apartamento di Time Share pa equis cantidad di año, y riba dje, cada año cu nan bin Aruba, riba esaki nan mester paga tambe 500 dollar pa mantencion.

Pero si conta bon, e camber ta wordo alquila maximo 52 vez pa año pasobra por bende e camber of suite ey 52 vez.

Laga pasa cu a bende e camber 30 vez, esaki kiermeen cu e compania ta gana 30x500 pa mantencion cu ta 15.000 dollar riba e camber of suite ey so. Corda si e compania di Time Share tin 50 pa 100 camber y ta bende cada un 30 vez.

Ami no ta gaña cu e camber su mantencion ta costa 15 mil dollar pa año.

Tin di e companianan aki cu ultimo diez año NUNCA a cambia muebles.

Ta e mes stoelnan, mesanan, camanan, weyanan, tayonan y coppienan, television cu konoppi tin den e cambenan. (algun cu television cu a dañá a haya aparato mas moderno).

Pero kico ta pasa, ora cu turistanan reclama, e trahadonan ta HAYA orden pa yuda compania gaña y ora director reclama na HEADOFFICE cu ta na Merca, e oficina principal ta prefera di bula riba su cabez y ta laga Aruba (no e hotel) haya mal imagen.

Tur esaki pasobra no tin control na Aruba riba e negoshinan aki..

Un otro recientemente a dicidi di cumenza renobacion di e cambenan, y cu kico nan a renoba muebles ?

Di un hotel grandi cu a bende su muebles usa pa tanto año caba, nan a compra dos container yen, vernisa e mueblenan y hinca nan den e cambenan. Ta asina ta renova muebles y camber !!

Trahadonan ta sigui haya keho, pero nan mester keda bira rond di e asunto, pasobra nan no mag di admiti nada sino nan ta perde trabao tambe.

Mientras tanto nos imagen ta sigui sufri den exterior, danki na e mes companianan di exterior cu ta doño na Aruba.

DIA DI BUKI.. DIA DI BOEKI...DIA DI BUKIE....DIA DI BOEKIE

Na 1995, e organizacion educacional, científico y cultural di Nacionnan Uni a institui "Dia mundial di buki" y año pasa 38 pais a tuma parti.

E año aki no tin cifra ainda.

Na Spaña el a wordo celebra combina cu fecha di Nacimiento di Cervantes y na mes momento tambe celebracion di fecha di San Jordi. A wordo entrega tambe e Premio Cervantes cu ta ser considera como e "Oscar di Literatura" cual a ser gana e año aki pa e escritor cubano Guillermo Cabrera infante.

Pakico elabora riba esaki ?

Pasobra lesamento ta un di e cosnan mas principal den e bida aki.

Ora mi ta bishita schoolnan, ora mi tin bishita na redaccion di studiantenan y alumnonan di diferente schoolnan, di schoolnan basico te schoolnan di enseñanza avanza, mi ta enfatisa riba "lesamento".

Lesat tur cos, di etiketa riba bleki y botter, riba caha, riba paki te cu e sushedad skirbi riba muraya, pero lesa lesa y lesa.

Si bo no ta compronde kico cierto palabra ta, busca diccionario pa haya sa, y si e diccionario no a yudabo compronde, busca hende pa dunabo splicacion.

Mi ta corda un bon conocir dimi, cu tabata carga apodo di Cha Candela, awe e ta difunto.

Mi a siña e meneer aki lesa na edad halto, y locual el a splicami despues tabata: "Esaki ta e cos mas bunita cu mi a yega di siña den mi bida" y esey ta despues di mas di 30 año cu e no por a lesa.

Semper cu mi a topa cune, e tabata referi riba skirbimento y lesamento y el a mira e importancia di esaki y a siña siña y siña.

Cu lesamento bo ta haya e desaroyo general cu ningun school ni universidad ta dunabo.

E conocimiento cu bo ta haya di lesamento ta un joya, e prenda di mas grandi cu bo por haya den bo bida.

Dushi ta cu ora bo ta den cualquier compania y bo por tuma parti na tur conversacion, djies pasobra bo a lesa hopi, bo ta lesa hopi y lo sigui lesa hopi.

Un persona mi a haci un pregunta ayera riba un asunto cu na mi parecer tur hende na mundo mester sa di dje.

Ora cu e no tabata sa, mi di cu mi colega: "e persona ey parce un persona masha educa y culto, pero djies mi pregunta y e contesta cu el a dunami ta mustra cu e ta MASHA POBER".

Pakico ?..... Pasobra e no sa lesa nada.

Juby

Women's Club ta planta matanan riba Dia di Tera

ORANJESTAD(AAN): -- Señor Leslie, cabezante di Abraham di Veer School, a planta un mata ayera den cuadro di Dia Internacional di Tera.

E idea pa planta mata a sali for di Women's Club of Aruba, mientras cu e matanan mes tabata donacion di Fantastic Gardens y Flora.

Women's Club ta spera cu esaki por ta e comienzo di reforestacion di Aruba.

Pa basta año caba, Women's Club of Aruba tin su programanan "Save The Earth" y "Limpi".

E programanan aki ta encera cu miembronan di e

club ta bishita cincuenta school na Aruba y ta controla riba limpieza.

Nan ta bishita e schoolnan por lo menos tres biaha pa año.

Na fin di cada año escolar, Women's Club ta duna premionan na e schoolnan cu tin e speelplaatsnan di mas limpi.

Ta for di e programanan aki, e idea pa planta mata na schoolnan a nace.

Dia di Tera ta e ocasion perfecto pa cumenza cu esaki.

Aunke ta dificil pa imagina awe, Aruba tabata cubri cu mata antes y tabata conoci



como Isla di Brazil pa motibo di e gran cantidad di mata di

Brazil cu tabata crece aki. Riba foto hunto cu articulo,

momentonan durante plantamento di e mata.